

**Pagiguk Iri Shup Douk Pol  
Nenekap Panam Eshesh Korin  
Iri  
Banenyi Baraen Pol Nagiguk  
Neneken Nyanak Um Eshesh  
Korin Iri**

1:1-11 Pol nenek beten um eshesh Korin aria  
nenek tenkyu um Iruhin um eshesh

1:12-7:16 Pol nakripesh baraen um apak Kris-  
ten munekeh iri aih hani sabainyi amaen  
apak ta minyusah iri

8:1-9:15 Baraen um utabor eshesh shaborubuk  
um shuko eshudok yaruhish Kristen iri um

10:1-12:21 Pol nakripesh baraen um ananish aih  
hani amaen douk naraen um nenek Krai  
ananin mour um. Nakri Krai atun natauru-  
man meyoh nenekan dodogowin.

13:1-10 Eshesh Korin ta shunek skelum eshesh  
kanak um eshesh shenek bilip wosik atin um  
Krais o uwok.

13:11-14 Pol nakripesh ananin nyatuh iri  
baraen aria nenemesh yopuhi nyumnah

<sup>1</sup>Eik Pol, anan Krai Jisas ananin aposel. Iruhin  
anan meyoh nakri aria nagraehe um enyudok  
mour aposel um inak ikripesh ananin baraen.  
Eik yani apakin wanin Timoti weneku apudok  
shup um ipak Iruhin ananishi arpeshe douk pape  
wabur Korin iri. Wenekap-umogu ipak pani ihish  
Iruhin ananish arpeshe douk shape ihirub warub

um agudok shokugi nahobig Akaia iri. <sup>2</sup> Ohwak wakri apakin Yain Iruhin nini Debeini Jisas Kraiss hutaaurumep meyoh aria hunek ipakiruh aparuh hur wosik.

*Pol Nenek Tenkyu Um Iruhin Um Agundok Natauruman Nagabe Ananin Mishin Um*

<sup>3</sup> Apak ta mutuk apakin Yain Iruhin ananin nyeigur nyuto iruhw. Anan douk apakin Debeini Jisas Kraiss ananin Iruhin aria ananin Yain shopunek. Aria anan douk baugos abom um agundok shenek gihaum kupaishi aria shataurumesh meyoh um. Anudok Iruhin apa nagabe eshudok arpesih douk amaen nyatogrumesh aria esheshiruh aparuh apa hor wosik. <sup>4</sup> Ihinyumori amaen nyatogur um apak iri, anan apa nataurumap nagabe apakish mishish aria apakiruh aparuh hor wosik. Nataurumap namudok um apak wosik abom um mutaurum eshudok arpesih douk enenyenen amaen nyatogrumesh iri aria esheshiruh aparuh hur wosik. Apak mutaurumesh kabi Iruhin narik nataurum apak um. <sup>5</sup> Debeiri eriger riguk Kraiss nemnekar iri, apak shopunek ta memnekar. Aria namudok atin. Kraiss douk nataurumap nagabe apakish mishish aria nenek apakiruh aparuh abom hor wosik. <sup>6</sup> Abudok nyutob amaen nyatogrum apak menyusah obi nyutob, enyudok douk nyatogrum Iruhin wata narao ipak patanamori aria ipakiruh aparuh hor wosik. Iruhin nenek apakiruh aparuh hor wosik aria anan shopunek nataurumep aria ipakiruh aparuh hor wosik. Amaen douk nyatogrumepp um Iruhin nunekep piyotu dodog. Ipak douk pasah

enyudok amaen kabi apak menyusah iri um, aria peyotu dodogowip. <sup>7</sup> Aria apak madukemesh abom um abudok nyutob amaen nyutogrumep obi nyutob, ipak ta piyotu dodog. Madukemesh um ipak pani apak marao eriger namudok aria ta wata punaki punoprom pani apak um agundok Debeini nunek apakiruh aparuh hor wosik um.

<sup>8</sup> O apakish ashukenyish owashish, apak makri ipak padukemesh um enyudok amaen douk nyatogrumap agudok shokugi nahobig Esia iri. Debeinyi amaen abom nyopubuk atap aria nyabouk apakin dodog nyabuhuk. Namudok aria apak mor urkwip makri apak ta mugok um atin. <sup>9</sup> Adur atin, apakigun um numun douk abom memnek yowegun kabi jas nakri um enen arpen ta nyugok aria enyen nyemnek yowen um. Enyudok douk nyatogrum apak kabi madae urkwip porum apakin dodog, uwok. Enyudok nyatagrumap um apak ta urkwip porum Iruhin ananin atin dodog douk nohuri shagok iri arpesh shakitak shape iri. <sup>10</sup> Enyudok abom debeinyi amaen ta nyop mugok, aria uwok. Iruhin anan wata narap mape wosik. Kweipon anan shopunek ta wata nurap mupe wosik abom. Eneyenen amaen nyukri nyutogrumap obi nyutob, apak douk madukemesh abom um anan adur ta nupe um nutaurumap namudok atin. <sup>11</sup> Aria ipak ta putaurumap puhwar Iruhin um anan nutaurumap. Iruhin ta numnek ipakin beten aria ta nutaurumap. Aria sabaishi ta shutik namudok aria shunek tenkyu um Iruhin um enyudok anan neneken nataurum apak meyoh um.

*Sagomatin Pol Nakri Nunak Um Korin Aria Ta Nakri Uwok Um Nanak*

<sup>12</sup> Eik apa yanagunukuk um enyudok atin. Enyudok. Eikim urkum mor wosik aria yadukemesh abom um eik apa yenek adurihi hani yopihi aih. Yani ipak mape obi nyutob douk yenekeh yariguk. EHUDOK aih, eik douk madae igipesh agundok atapishi arpeshin saki aria douk inekesh uwe, uwok. EHEH douk hanakumori Iruhin atun. Anan douk nataurume meyoh aria neyohur yenekeh. <sup>13-14</sup> Abudok nyutob yenekumep-ugu parik iri shup pani apudok doukip obi nyutob, eik apa yowemagu baraan douk wosik putarihen aria pudukem baugenyum iri atin. Adur, douk abudok nyutob, ipak douk madae pudukemen wosik uwe um ihin yenyem iri baraan, uwok. Aria eik yadukemesh um anob nyutob, ipak ta pudukemesh abom um baugenyum ihenyumori eikin baraan. Pudukemesh aria ahudok nyumnah Jisas apakin Debeini nutanamori ahi hutogrum, ipak ta putuk eikin nyeigur punadudareh kabi eik ta ituk ipakish nyeiguhw inadudareh um ipak um. <sup>15-16</sup> Eik douk yadukemesh abom um abudok nyutob eik inaku itrip obi nyutob, ipak ta punadudareh um eik. Douk namudok aria yakri um inaku itiguk ipak purik aria wata ikutip pupeik aria inak um agudok anag shokugi nahobig Masedonia. Aria abudok nyutob ikutukuk Masedonia obi nyutob, eik douk yakri um wata inaki itripuk. Yakri inekesh namudok um itaurumep aria Iruhin nunekep punadudareh biyeh. Aria shopunek yakri inaku itrip um ipak

ta putaurume um inak um agudok shokugi nahobig Judia. <sup>17</sup> Aria douk ta mumam? Ipak pakri eik yakri enyudok baraeen um inakumagu ipak pakri eik yenek rohwmep, aka? Ipak pakri eik atin yeyagwreh adurin atinyi baraeen meyoh aria wata yakri uwok um inakugu, aka? Kabi agundok atapishi arpesh apa shenekesh um, um agundok pakri eik apa yakri wosik aria uwok shopunek atin um? Adur, namudok eik madae inekesh atin uwe um, uwok. <sup>18</sup> Iruhin apa nagipesh ihinyumori ananin baraeen wosik. Aria douk namudok atin. Eik apa yakripep adurin atin baraeen. Madae ipeum ikripep wosik aria wata inabadig ikripep um uwok shopunek atin uwe, uwok. <sup>19</sup> Eik yani Sailas aria Timoti douk makripep baraeen um Iruhin ananin Nuganin Jisas Krai. Aria padukemesh. Krai douk madae nunek roh w nukri wosik aria wata nukri uwok shopunek atin uwe, uwok. Krai anan douk napeum nakri wosik atin. <sup>20</sup> Ihinyumorim Iruhin nakripep-enyi adurin atinyi baraeen promis douk nyape. Aria Krai douk nagipesh enyudok ihinyumorim baraeen aria neneken nyatogur adurin atin. Namudok aria abudok nyutob apak memnek enyudok Iruhin ananin adurin atinyi baraeen obi nyutob, apak apa makri um Krai ananin nyeigur makri, "Adur" aria matuk Iruhin ananin nyeigur nyato iruhw. <sup>21</sup> Iruhin meyoh apa nenek ipak pani apak menek bilip um Krai meyotu dodog. Aria douk nanagraehap nakop ananin Mishin aria mape ananishi arpesh. <sup>22</sup> Anan douk nenek ananin kak nanagraehap mape ananipari atup. Aria nakop ananin Mishin

nyawish nyape apakiruh aparuh. Enyudok ananin Mishin douk nyarik iri yopinyi enyudok um ihishmorim yopishi eshudok douk Iruhin nakri um kweipon ta nukopesh iri. Enyudok Mishin douk maraen nyapenyap. Namudok aria apak madukemesh abom um ihishmori eshudok enesh douk adur ta muraesh um atin.

*Pol Madae Nunak Arigas Um Korin Uwe*

<sup>23</sup> Douk eik yakri um Iruhin ananin nyeigur um inek enyudok eikin baraen nyutogur adurin. Adur atin, eik madae inaku Korin arigas uwe, uwok. Um maresh? Eik yakri uwok um inaku ikripep enen dodogowinyi baraen aria inek ipakip urkwip yowep. Yakri uwok um inakumagu douk namudok. <sup>24</sup> Eik douk madae ikri apak mupe debeipari um mugapesh um ipakin bilip um Kraiss uwe, uwok. Agundok penek bilip um Kraiss um douk peyotu dodog. Apak apa mani ipak manoprom um mour ipak ta pugipesh Kraiss wosik aria punadudareh abom puriguk.

## 2

<sup>1</sup> Eik yenek urkum namudok aria yakri uwok um inaku, uwok. Um maresh? Yakri ta inaku aria inekep ipakiruh aparuh yoweruh kabi riguk um. <sup>2</sup> Aria ta eik inaku inek ipakiruh aparuh yoweruh akure, aria ta wata omi nyupe um nyunek eik inadudareh? Douk ipak enyudok yenekep aparuh yoweruh iri atip. <sup>3</sup> Ipak douk penek eik yanadudareh iri. Namudok aria yakri uwok um inaku itrip itik ipakih aih aria eikihw apahw yowehw, uwok. Douk namudok aria eik yeneku shup douk riguk yenekapugu iri. Eik yadukem

ipak. Aria eik inadudareh um enesh eshudok um, ipak ihipmorim shopunek apa panadudareh-umesh. <sup>4</sup> Adur, abudok nyutob yeneku shup obi nyutob, eik douk apahw yowehw abom aria urkum yowem yareh yariguk. Aria eik madae inekapumagu inek ipakiruh aparuh yoweruh uwe, uwok. Yenekap-umagu ipak pudukemesh um agundok eik urkum manawashamep abom um.

*Eshesh Korin Madae Shusuhwesh Shupe Eshudok Douk Eshesh Shenekesh Iri Yoweishi Inahos Um Kupaishi, Uwok*

<sup>5</sup> Aria anan arman nenek enesh arpesih um ipak aparuh yoweruh um, anan douk madae nunek eik apahw yowehw uwe, uwok. Eik yakri uwok um iyagwreh sabainyi dodogowinyi baraen um enyudok, uwok. Aria yakri ikri anudok arman douk nenek ipak ihipmorim um ipakiruh aparuh yoweruh. <sup>6</sup> Aria amaen douk ipak sabaipari pako anudok arman um pugapeshan um douk jurug. <sup>7</sup> Douk ipak mare wata punasuhwen pupe, uwok. Pukwrenyuguk. Ipak ta pugapesh ananihw apahw um wata hwur wosik. Uwok um, ta ananihw apahw yowehw aria nupe yowen abom. <sup>8</sup> Namudok aria douk yeyagwreh dodog um piyabigan aria nudukemesh um ipakip urk-wip wata panawashaman atin. <sup>9</sup> Apudok riguk yenekap iri shup douk yenekapugu um ikwiraeh ipak meyoh. Yakri idukem ipakih aih um ipak apa pagipesh eikin baraen um ihishmorim eshudok eneshenesh aka, uwok. <sup>10</sup> Aria ipak madae pusuwen pupe um yoweishi inahos um anudok arman nenekeshumep iri um, eik douk shopunek

madae isuwen ipe, yakri nyeneken. Aria ta anudok arman nenek enesh yoweishi inahos um eik aria eik ta ikwreyeshuk mare isuwesh um, aria eik douk yakri nyeneken. Kraiss douk natiwe aria nadukeme. Eik yenekesh namudok um yakri ipak pupe wosik. <sup>11</sup> Eik apa yenekesh namudok um maresh? Yakri ta Satan nunek uhwinyumap aria nop mubuhuk. Aria apak wosik madukem ehudok ananin aih um nenek rohwmesh um.

*Pol Nakri Nutik Taitus Abom*

<sup>12</sup> Abudok nyutob yanak yatogragu wabur Troas um ikripesh yopinyi baraen um Kraiss obi nyutob, eik douk yatik um Debeini nenekume yah um inek enyudok ananin mour. <sup>13</sup> Aria eikihw apahw douk madae hwur wosik uwe, uwok. Um maresh? Eik madae iparug eikin wanin Taitus agundok uwe, uwok. Namudok aria yenekumeshuk yopuhi nyumnah eshesh Troas aria yakutishukuk yanak yatogur agudok anag shokugi nahobig Masedonia.

*Iruhin Atun Apa Nataurum Ananim Aposel Dodogowim Aria Henek Ananin Mour*

<sup>14</sup> Aria douk yenek tenkyu um Iruhin. Um maresh? Ihih nyumneh anan apa nataurum apak mantoruh Kraiss aria mani anan manoprom aria mabo yoweih aih habuhuk.\* Iruhin nohur apak makripesh ananin yopinyi baraen aria arpesh shape ihirub warub iri shemneken shadukem Kraiss wosik. Agundok shadukem Kraiss um douk kabi shemnek anar yopuri unar douk rowe ranak

---

\* **2:14:** Baugenyum enyudok baraen nyetem Grik iri douk madae nyutogur wosik uwe, uwok.



ihirub warub aria shemnekar shanadudareh um. <sup>15</sup> Um maresh? Apak douk kabi enen sanda nyeisik yopuri unar iri um. Enyudok sanda douk Kraish nenek ofamen nako Iruhin iri. Enyen douk nyeisik nyanak um eshudok douk Iruhin nape naraesh shatanamori shape wosik iri shani eshudok douk shape shagipesh ahudok yah hanak um yoweiburi wabur iri shopunek. <sup>16</sup> Eshudok douk shape shagipesh ahudok yah hanakum yoweiburi wabur iri, enyudok yopinyi sanda douk nyeisig kabi unar um. Aria arudok unar ta runekesh shugok shunak shuwishuk. Aria eshudok douk Iruhin nape naraesh iri, eshesh douk shemnek enyudok sanda nyeisig yopuri unar aria ta runekesh shupe wosik abom ihih nyumneh. Aria enyudokmori mour ta omi dodogowin um nyuneken? Uwok meyo. <sup>17</sup> Anam sabaimi armam apa harahaen hanak aria hanator utabor um agundok hakripesh Iruhin ananin baraen um. Aria apak madae muneken kabi amam heneken um uwe, uwok. Apak mantoruh Kraish iri, apak douk Iruhin nakop enyudok mour aria neshopokap manak meneken wosik. Anan natrip um douk madae munek roh w uwe, uwok. Makripesh ananin baraen wosik abom.

### 3

#### *Amam Aposel Douk Henek Mourum Iruhin Ananin Namunyi Kontrak Iri*

<sup>1</sup> Baraen iganigadae makripep um, ipak apa pakri apak wata mape matuk apakish nyeiguhw shato iruhw, aka? Ipak apa pakri apak madae dodogowipari uwe, aria morig ipak

o kupaishi um punek anap shup aria putuk apakish nyeiguhw shuto iruhw aka, uwok? Kabi anam hape henekesh um? Adur atin uwok. <sup>2</sup> Ipak kanak douk kabi apakip shup abom um arpesh shutrip aria shudukem apakih aih. Baraen nyape apudok shup iri douk nyape numun apakip urkwip um ihishmorim arpesh shutrin aria shutarihen shudukem apakih aih. <sup>3</sup> Ipak kanak douk adur abom pape kabi anap shup douk Krais nenekap iri um. Nenek apudok shup um agundok munek enyudok ananin mour aria mataurumep patogur Kristen um. Anan douk madae nukwu ink nunekap uwe, uwok. Nakwu Iruhin douk nape ihih nyumneh iri ananin Mishin nenekap. Aria douk madae nunekap nuwem baraen nyutem utabor uwe, uwok. Nenekap nenyem nyape numun arpeship urkwip. <sup>4</sup> Apak douk makri enyudok baraen um maresh? Apak makri Iruhin anan dodogowin atun abom. Krais nataurumap aria madukemesh um Iruhin ta nunek ananin mour nyutogur yopin abom. <sup>5</sup> Adur, apak kanak ta mare wosik um munek enyudok mour, uwok. Iruhin atun nutaurumap dodogowip aria douk wosik meneken. <sup>6</sup> Iruhin anan kanak nutaurumap aria wosik munek enyudok ananin mour um manak makripesh baraen um enyudok ananin namunyi kontrak. Enyudok namunyi kontrak douk madae hunyem nyutem um shus meyoh uwe, uwok. Enyen douk Iruhin ananin Mishin meyoh nyakwarumen. Aria enyudok enen baraen lo henyem shus meyoh iri, enyen douk nyenek arpesh shagok shanak shawishuk. Aria

Iruhin ananin Mishin douk nyenekesh shape wosik abom. <sup>7</sup> Ipak urkwip purum enyudok. Enyudok mour douk amam hakripesh Iruhin ananin lo seiwok nakoguk Moses enyi heneken iri, enyen douk nyenek arpeshe shagok. Abudok nyutob Iruhin nowemori enyudok lo beriyaibori utabor aria nekeshenyi obi nyutob, anan Iruhin douk natruguni abom aria bogaragun. Namudok aria sagomatin, Moses ananin domaen douk nyatrugun abom aria eshesh Israel madae wosik um shutik ananin domaen uwe, uwok. Aria madae roubi uwe aria ananin domaen wata nyape nyatrugun wosik atin arigah arigaha aria hagokenyuk. <sup>8</sup> Aria enyudok namunyi mour um Iruhin nohur apak manak makripesh ananin baraen aria sharao ananin Mishin um, enyen douk dedeben atin abom. Enyen douk nyeshagrakuk seiwoke mour abom um lo. Douk apak menek enyudok namunyi mour aria matik um Iruhin neneken nyape um nyatogur dodogowin atin aria bogaragun abom. Enyen douk nyeshagrakuk agundok enyudok seiwok Moses neneken iri mour ba bogaragun um. <sup>9</sup> Enyudok seiwoke mour douk nyagipesh lo nyeneken iri, enyen douk apa nyenekumap baraen aria nyakrium apak yoweipari atup aria ta mugok munak muwishuk. Enyudok seiwoke mour douk nyani iri Iruhin ananit debeiti lait nyanaki. Aria enyudok namunyi mour um makrip arpeshe um shutogur yopish um, enyen douk nyarauri debeiti abom Iruhin ananit lait teshagrakuk atudok seiwoke mour nyarati iri. <sup>10</sup> Enyudok namunyi mour douk Iruhin

napuhur meneken iri, enyen douk dedeben atin abom nyatrugun nyeshagrakuk agundok seiwok harik heneken iri mour nyatrugun um. Namudok aria douk, enyudok seiwokin mour nyatrugun um douk madae nyutrugun uwe, uwok. <sup>11</sup> Enyudok seiwokin nyarik iri mour douk nyape banab nyutob meyoh aria nyatuh. Enyen douk nyani atudok debeiti Iruhin ananit lait nyanaki. Namudok aria douk madukemesh. Enyudok namunyi mour douk ta nyupe ihih nyumneh abom iri, enyen douk nyarauri debeiti abom Iruhin ananit lait. Atat douk tatrugun abom teshagrakuk seiwokin mour nyarati iri.

<sup>12</sup> Apak douk madukemesh abom makri adur um atudok lait ta tutrugun abom tupe namudok atin. Namudok aria apak douk mare munogugur atin uwe, uwok. Apa meyotu dodog aria makripesh Iruhin ananin baraen yopugunum. <sup>13</sup> Apak douk madae munekesh kabi Moses nenekesh um uwe, uwok. Abudok nyutob ananin domaen wata nyape nyatrugun obi nyutob, anan douk nohuri anap rupahip aria nashapomuk domaen. Nenekesh namudok um eshesh Israel mare shutik ananin domaen douk nyape nyatrugun atin arigah arigaha aria ta hagokenyuk iri. <sup>14</sup> Aria eshesh Israel douk baragos seshukesh abom. Seiwok arigaha douk, eshesh shatarih Iruhin ananin baraen um seiwokin kontrak obi nyutob, eshesh douk madae shudukemen atin uwe baugenyum, uwok. Agundok atup rupahip wata pape aria poweshiguk esheship urkwip. Madae enen arpen nyupniguk uwe, uwok. Opudok rupahip punaniguk obi nyutob,

apap Iruhin ta nupniguk abudok atub nyutob arpesh shunotukur Kraisi obi nyutob. <sup>15</sup> Seiwok arigaha douk, abudok nyutob shatarih Iruhin ananin baraan seiwok nakoguk Moses enyi um, apudok rupahip douk watak poweshik esheship urkwip. <sup>16</sup> Aria eshudok arpesh douk shatanam shukon aparuh Debeini iri, eshudok Iruhin apa nakweshih-umeshuk apudok rupahip. <sup>17</sup> Aria enyudok baraan um yakri Debeini um, enyen douk nyakri Iruhin ananin Mishin. Meinyi arpen douk Debeini ananin Mishin nyapenyen iri, enyen douk madae enesh eshudok shuweshiken uwe, uwok. Enyudok arpen douk kabi riguk nyonoweshik aria douk wata shakweshihen um. <sup>18</sup> Aria apak ihishmorim douk madae enesh eshudok shubeshuk apakigos yamagos uwe, uwok. Namudok aria Debeini ananit debeiti lait tatrugun tanaki tasuhw apak matrugun aria tatanam tatrugun tasuhw kupaishi arpesh. Ihih nyumneh apak mape um marao atudok lait namudok atin aria tenekap matogur anahaeh abom madukem Debeini-eh aih. Debeini anan douk Mishin. Anan kanak napeum nenekap matogur namudok aria meshagrakuk kabi riguk marik mape um.

## 4

### *Amam Aposel Douk Hape Kabi Annabis Marus*

#### *Um*

<sup>1</sup> Iruhin anan nenek gihaumap aria nakop enyudok mour. Namudok aria apak douk mare arigehop mukri mukutinyuk uwe, uwok. <sup>2</sup> Apak douk mekehuk agabus ihishmorim ehudok abraenyihi shanabeshuk shenekeh iri yoweih

aih. Mare munek roh w mutogur anahaeh um Iruhin ananin barae n mukri pesh kupainyi uwe, uwok. Apak apa makri pesh ananin adurinyi barae n yopugunum atugun. Um makri ihish-morim ar pesh shutrip shudukem apakih aih, aria esheship urkwip pukri apak douk menek Iruhin ananin mour wosik aria anan natrup nakri wosik. <sup>3</sup> Aria ta enesh ar pesh baragos seshukesh mare shudukem baugenyum enyudok makri peshenyi Iruhin ananin yopinyi barae n um, eshudok ar pesh douk shape shagipesh ahudok yah douk hanakum yoweiburi wabur iri. <sup>4</sup> Eshesh douk madae shunek bilip um Krai s uwe, uwok. Um maresh? Satan agundok atapin rohwin god noweshiguk esheship urkwip abom aria madae shutik atudok lait douk tatrugun-umesh iri uwe, uwok. Atudok lait douk takitak enyudok Iruhin ananin yopinyi barae n. Enyen douk nyeyabigap um agundok Krai s natrugun abom aria nadukemum Iruhin um. <sup>5</sup> Mnek, apak douk madae mupe um mukri pesh barae n um apak kanak aria mupe mutuk apakish nyeiguhw shuto iruhw uwe, uwok. Apak apa makri pesh namudok. Makri, “Jisas Krai s anan douk De-beini. Aria apak apa magipesh anan ih aih aria mape shakamum ipak mape menekumep mour meyoh.” <sup>6</sup> Sei wok wata sagomatin Iruhin nakri, “Lait tutogur tuhiyahuk arukwutigun um.” Aria douk anudok atun Iruhin neneki ananit lait tanaki tatrugun numun apakip urkwip. Atudok lait tatrugunumap matik Krai s ananin do-maen aria madukemesh um agundok Iruhin dodogowin atun abom aria natrugun nariguk

um.

<sup>7</sup> Apak aposel douk madukem amnabis marus madae dodogowimi armam uwe, uwok. Aria apak douk enesh yopishi eshudok eneshenesh shapenyap kabi debeibori abom utabor bor numun amnabis marus um. Yopishi eshudok eneshenesh douk shapenyap um ihish arpes shutrish aria shudukemesh um enyudok dodogowinyi gobi apak masuhwen munek ananin mour um douk nyeshagrakuk ihishmori eneshenesh eshudok. Enyudok gobi douk nyanakumori Iruhin atun. Apak aposel uwok. <sup>8</sup> Adur, ihigun manak um douk enenyenen amaen nyatogrumap, aria enyen madae nyupabuk atap abom uwe, uwok. Sabaishi eshudok apa shenekap enenyenen shanumogap, aria madae mugagak abom mupe namudok uwe. <sup>9</sup> Anabik um shenekap enenyenen, aria Iruhin madae nukutupagak atin uwe, uwok. Nani apak mape. Apa shap matu, aria madae mugok abom uwe, uwok. <sup>10</sup> Ihih nyumneh apak douk shap shakri apak mugok abom um atugun, kabi shabo Jisas nagok um. Aria agundok shap aria apak wata dodogowip mape um douk mape um arpes shutrup aria shudukemesh shukri Jisas anan douk adur abom nape apak. <sup>11</sup> Ihih nyumneh apak mape o marahaen um, arpes apa shokwiraeh um shop mugok. Enyudok douk nyatogrumap um arpes shutik apak apa magok aria shudukemesh shukri Jisas anan adur nape abom apak. <sup>12</sup> Enenyenen amaen nyatogrum apak aposel aria makri um mugok um atugun. Apak mape namudok aria ipak ta pupe wosik

abom namudok atin.

<sup>13</sup> Baraen nyetem Iruhin ananik Buk iri nyakri namudok. “Eik douk yenek bilip um Iruhin, namudok aria douk yakripesh-uman.” Apak aposel douk shopunek munek bilip um Jisas aria magipesh ehudok atih aih makripesh um Iruhin ananin baraen. <sup>14</sup> Apak menekesh namudok um maresh? Apak madukemesh namudok. Jisas douk nagok aria Iruhin wata nonohur nakitak nape. Namudok aria kabi nohur Jisas nakitak napeum, anan ta wata shopunek nuhur apak munotukur Kraisa aria mukitaki aria nurauri ipak puni apak munak miyotu abom agundok Iruhin napeum. <sup>15</sup> Eik yakri namudok um maresh? Eik yadukemesh um ihinyumorim enyudok douk nyatogrum apak um nyutaurum ipak punek bilip um Kraisa aria pupe wosik. Aria ehudok aih um Iruhin nataurumap meyoh um douk hape hatogrum sabaishi arpes hape abom aria shenek bilipuman. Namudok aria eshudok arpes ta shunadudareh aria shunek tenkyu um Iruhin shuriguk. Aria ta shutuk ananin nyeigur nyuto iruhw.

*Amam Aposel Douk Hasuhw Kraisa Ananin Baraen Aria Heyotu Dodogowim Atum Um Ananin Mour*

<sup>16</sup> Douk namudok aria apak madae aparuh yoweruh mukri mukutukuk ananin mour uwe, uwok. Adur, apakiruh yegeshiweruh douk hape hagok aria madae dodogo-wiruh uwe, aria numun apakiruh aparuh apa harao namunyi dodog aria ihih nyumneh hapeum hatogur namuruhi.



17 Um maresh? Apak madukemesh um enyudok amaen nyatogrumap marao eriger aria douk madae debeinyi uwe, uwok. Ta muraen banab nyutob meyo. Enyudok douk nyatogrumap um kweipon apak ta mutrugun abom mupe wosik ihih nyumneh agundok Iruhin napeum. Agundok kweipon mupe wosik um douk neshagrakuk abom ihinyumorim amaen douk nyape nyatogrumap. 18 Apak douk madae mupe um mutik enyudok enenyenen amaen douk nyatogrumap iri uwe, uwok. Apak mape aria urkwip por abom um eshudok douk apak madae mutrish apakis nabes iri uwe. Um maresh? Eshudok douk apa matrish iri, eshesh ta shupe banab nyutob meyo. Aria yopishi eshudok douk apak madae wosik um mutrish iri uwe, eshesh ta shupe ihih nyumneh abom.

## 5

1 Apak madukemesh um, ta arhudok douk mapenyoruh agundok atap iri yegeshiweruh hukri hunak yoweruhuk, aria arhudok anaruh Iruhin nakri nukoparuh iri douk hakusumap gani iruhw heven. Arhudok yegeshiweruh douk madae arpes shunekaruh wis uwe, uwok. Aria araruh ta hupe abom namudok atin ihih nyumneh. 2 Aria douk apak mape agundok atap obi nyutob, apak douk mape moreh makri mura arhudok anaruh apakiruh yegeshiweruh douk hakus iruhw heven iri. Makri muraruh um muruhur hishigarup kabi rupeh um. 3 Um maresh? Abudok nyutob mura arhudok yegeshiweruh muruhur obi nyutob, apak ta

mare wata mupe kabi magor mape meyoh um, uwok. <sup>4</sup> Abudok nyutob wata mape agundok atapiruh yegeshiweruh\* obi nyutob, apakiruh aparuh apa yoweruh aria mape moreh. Aria apak douk madae mukri uwok um agundok atapiruh yegeshiweruh uwe, uwok. Aria makri um muraonamuruhi iruhwiruh yegeshiweruh muruhur. Arhudok doukiruh yegeshiweruh douk ta hutogur anahaeh abom hutogur yopuruh hupe namudok atin. <sup>5</sup> Aria enyudok arpen douk nyataurumap um ehudok aih iri douk Iruhin. Anan douk narik adur nakop ananin Mishin. Enyudok Mishin douk sagomatinyin abom um eshudok enesh yopishi douk Iruhin nakri adur um ta nukopesh iri. Apak douk marao enyudok ananin Mishin. Douk namudok aria madukemesh um ihishmorim yopishi eshudok adur ta muraesh abom um atugun. <sup>6</sup> Apak apa urkwip porum enyudok aria ihih nyumneh mape dodogowip madae urkwip yowep uwe. Apak douk madukemesh. Abudok nyutob apak wata mape um arhudok yegeshiweruh obi nyutob, apak madae muni Debeini mupe agundok anan napeum uwe, uwok. <sup>7</sup> Douk mape agundok atap obi nyutob, apak madae mutrun uwe, uwok. Apak douk masuhw ananin baraen dodog aria mape magipeshen atin. <sup>8</sup> Aria douk yakri. Apak douk dodogowip mape aria makri abom um mukutukuk arhudok yegeshiweruh munak muni Debeini mupe atugun. <sup>9</sup> Aria apak wata mupe

---

\* **5:4:** Baraen nyetem Grik um douk nyakri selig urusag. Baugenyumum douk nyakri apakiruh yegeshiweruh.

agundok atap, o mupe gani iruhw um, sago-  
 matin apak ta dodogowip atap urkwip pur abom  
 um mugipesh anan nakri ahi aih um munekan  
 nanadudareh-umap. <sup>10</sup> Um maresh? Apak  
 madukemesh um apak ihishmorim ta munak  
 mutogur miyotu um Kraiss ananit kwot. Aria ta  
 apak munek yopishi o yoweishi inahos abudok  
 nyutob mape arhudok yegeshiweruh obi nyutob,  
 apak ihishmorim atin atin ta murao yopinyi o  
 yoweinyi poe wosik um aih apak menekeh iri.

*Apak Aposel Douk Mour Nyapenyap Um Mu-  
 taurum Arpesh Shuni Iruhin Shupe Atugun*

<sup>11</sup> Apak douk madukemesh um agundok  
 manogugur um Iruhin aria mape shakamum  
 anan. Namudok aria douk mape mohur  
 arpesh esheship urkwip um shunek bilipuman.  
 Iruhin douk nadukemesh um apakip urkwip  
 aria aih. Eheh douk yopihi atih. Aria eik  
 Pol yakri ipakip urkwip shopunek pakri apak  
 adur munek yopinyi mour. <sup>12</sup> Enyudok baraen  
 douk madae mukriyen um munek ipak putuk  
 apakish nyeiguhw shuto iruhw uwe, uwok. Apak  
 douk mowem-umepagu enyudok baraen um  
 makri ipak putarihen aria punadudareh um  
 apakih aih. Makri punadudareh aria wosik  
 dodogowip um puwanamesh baraen eshudok  
 douk apa shanadudareh meyoh um arpeshish  
 nyeiguhw iri. Eshudokmori arpesh douk madae  
 shunududareh um aih hape numun esheship  
 urkwip iri uwe, uwok. <sup>13</sup> Aria ta adur apakin  
 baraen o aih hatogur kabi shagugak iri esheshih  
 um, o nyenekesh. Enyudok douk munek Iruhin

ananin mour atin. Aria ta apak urkwip pur wosik um, aria apak douk menekesh namudok um mutaurum ipak. <sup>14</sup> Krai anan douk urkum manawasham apak abom. Aria enyudok apa nyapuhur um munek enyudok apakin mour. Um maresh? Apak douk madukemesh um, atun arman meyoh narao apak ihishmorim apakiyu outumeb aria nagok. Namudok aria apak ihishmorim douk magok iri atup. <sup>15</sup> Anudok arman douk nagok um ihishmorim arpesh. Nagok um apak wata mape iri um apak mare wata urkwip purum mugipesh apakip atip urkwip, uwok. Apak ta urkwip purum anudok douk narao apakiyu outumeb nagok wata nakitaki aria mugipesh ananim atum urkum. <sup>16</sup> Namudok aria apak douk madae mupe um mugipesh shapeum shagipesh ahudok atapihi aih iri esheship urkwip aria munek skelum enesh arpesh esheshih aih uwe, uwok. Adur, riguk apak douk magipesh epudokmori urkwip aria mape mograeh um mudukemesh um Krai anan aih, aria douk madae munekesh namudok atin uwe, uwok. <sup>17</sup> Namudok aria ta enen arpen nyutukur Krai um, aria Iruhin douk neneken nyatogur naminyi iri. Gamo pumnek! Douk, seiwokihi yoweihi aih douk hanak hawishuk aria namihi hatogur hape. <sup>18</sup> Ehudok ihihmorim namihi aih douk Iruhin meyoh nenekehumap. Seiwok douk mape ananishi horim. Aria anan wata nenekap mani anan mape atugun um enyudok Krai ananin mour atin. Aria ahudok nyumnah douk nakop enyudok mour um mutaurum ananish horim shutanamori shuni anan shupe atugun.

<sup>19</sup> Apakin baraeen douk namudok. Iruhin nape narauri ihishmorim arpesh shatanamori shani anan shape atugun um enyudok Kraiss ananin mour atin. Anan douk madae nukri um urkum mur um eshesh shenekesh iri yoweishi inahos uwe, uwok. Aria douk nakop mour apak um mukriפש enyudok baraeen um nyuhur ananish horim wata shatanam shuni anan shupe atugun.

<sup>20</sup> Namudok aria apak douk enyudok morao Kraiss ananit nokwat aria makriפש ananin baraeen. Enyudok douk kabi Iruhin anan meyoh nakwu apakig nokwatog nahwarari ihishmorim arpesh um. Apak douk morao Kraiss ananit nokwat aria makrip ihishmorim arpesh namudok. Makri, “Yaipo, ipak pukutukuk agundok penek horim um Iruhin um um aria wata putanam puni anan pupe atugun.” <sup>21</sup> Kraiss anan douk yopuni. Madae nunekesh atish uwe yoweishi inahos. Aria Iruhin douk nakri nutaurumap, namudok aria ihishmori apak menekesh iri yoweishi inahos douk nenekesh shato Kraiss atun abom aria natogur kabi nenek yoweishi inahos atin iri um. Iruhin nenekesh namudok um apak munatukur Kraiss aria mutogur Iruhin ananishi yopishi arpesh.

## 6

### *Amam Aposel Hanak Hakriפש Iruhin Ananin Baraeen Aria Harao Sabainyi Amaen*

<sup>1</sup> Apak douk apa mani Iruhin manoprom menek mour. Aria douk dodogowip atup makri mukriפש namudok. “Iruhin douk nataurumep meyoh. Aria ipak mare pukri enyudok douk enen

rohwin mour, uwok. Ipak ta punek yopihi aih.”

<sup>2</sup> Iruhin douk nakri namudok,

“Eik kanak yagraeh nyutob um wata iraeap aria putanamori pupe wosik abom.

Arigaha douk abom abudok nyutob eik yem-nekep aria yataaurumep meyoh.”

Aria douk pumnek! Iruhin nenek gihaumap aria nataurumap meyoh um douk abom abudok nyutob. Narap matanamori mape wosik atin um douk arigaha kweipon.

<sup>3</sup> Apak douk madae munek eneh aih douk hunek enesh arpes shutu shunek yoweishi inahos aria kupaishi shutrish shuhwar apakin mour yoweishi inahos shapeyenyi uwe, uwok.

<sup>4</sup> Aria apak meneken iri mour, apak meyabig ihish arpesh aria shadukemesh um apak douk masuhw Iruhin ananin mour iri. Apak douk meyabigesh namudok. Apak meyotu dodogowip atup um enenyenen nyatogrumap iri amaen, agundok shenekap enenyenen um, shenekap aparuh yoweruh morao debeiri eriger um, apak douk meyotu dodog.

<sup>5</sup> Shap showeshikap, horim sher sharihap aria shahwar shakripap yoweinyi barae apak apa menek debeinyi mour, madae mishuh wosik atin uwe, aria nyurub bap mape,

<sup>6</sup> apa menek yopihi aih, madukemesh um Iruhin wosik, madae juwehosip arigas atin uwe, apa menek yopunyi atin um arpesh mataaurumesh, morao dodog Iruhin ananin Mishin, madae munek rohw atin uwe. Aria apak douk meyabig ehudok aih abom um urkwip panawasham kupaishi um.

<sup>7</sup> Apa makripesh adurin atinyi barae aria munek mour um Iruhin ananin

dodog, apa masuhw yopihi atih aih kabi masuhw wanohwish eshudok um yopinyi rogur ehah um anugagrish roguhwa aria manak um wanohw mabo yoweishi inahos shabuhuk um. <sup>8</sup> Enesh apa shatuk apakish nyeiguhw, enesh shanumogesh apak, enesh shenepak dehik, enesh apa shakrip kupaishi shakri apak munek yopinyi mour, enesh shakri menek rohwa iri. Aria esheshin baraan douk madae adurin uwe, uwok. Apak apa meyagwreh adurin atin baraan. <sup>9</sup> Apak douk mape kabi madae enesh arpeshe shudukemap um uwe, aria uwok. Sabaishi shadukemap abom. Mape kabi arpeshe shakri shugok iri um, aria uwok. Wata mape atin. Shap shakumape eshudok eneshenesh, aria madae shop abom ba mugok uwe, uwok. <sup>10</sup> Anabik um aparuh yoweruh abom, aria manadudareh um douk manadudareh mape namudok atin. Apak douk mape kabi eshudok yaruhish um, aria apak apa mataurum sabaishi arpeshe shanaparug sabaishi yopishi eshudok eneshenesh. Anabik um eshudok eneshenesh wokap abom, aria apak douk magrem ihishmori Iruhin ananish yopiyopishi eshudok eneshenesh.

<sup>11</sup> O ipak Iruhin ananish arpeshe pape Korin iri, apak ipak urkwip douk panawasham abom ipak. Namudok aria apak douk makripep ihinyumorim baraan douk nyape numun apakiruh aparuh iri. Madae mubeshukuk enen uwe, uwok. <sup>12</sup> Apak madae muweshiguk apak ipak urkwip um ipak uwe, uwok. Apak douk urkwip panawashamep. Aria ipak douk poweshiguk ipak ipak urkwip um apak. <sup>13</sup> Ahudok nyumnah douk ikripep kabi anan yain nakrip ananish batowish um. Apak douk urkwip

panawasham ipak. Namudok aria ipak ta punek ehudok atih aih kabi apak menekeh um ipak um. Ipakip urkwip shopunek ta punawasham abom apak.

*Apak Douk Kabi Iruhin Ananit Urupat Um*

<sup>14</sup> Ipak mare puni eshesh madae shunek bilip um Iruhin iri uwe punoprom o punek mour atugun atin, uwok. Um maresh? Eshesh douk enesh kupaishi aria anahaehish. Nyumneh iri weibus douk madae shunorirum shutogur uwe, uwok. Namudok atin, yopihi aih douk madae huni yoweishi inahos shunorirum uwe, uwok.

<sup>15</sup> Krais douk madae nini Satan hupe atugun husuhw atin uwe, uwok. Aria ipak pakri shenek bilip um Krais iri ta shuni eshudok madae shunek bilipman iri uwe shupe atugun shusuhw atin aka? O uwok meyoh. <sup>16</sup> Atudok shenek lotu um Iruhin atari urupat douk madae tuni ogwudok onog shenek lotu um rohwimi godomi um gunorirum uwe, uwok. Ipak douk padukemesh. Apak atin atin douk anudok abom nape ihih nyumneh iri Iruhin napenyogwi urusag. Kabi riguk anan kanak nakriyuk um. Nakri,

“Eik ta ini eshesh mupe aria ipe inek yowi kare um eshesh.

Eik ta ipe esheshin Iruhin aria eshesh shupe eikish arpesh.”

<sup>17</sup> Namudok aria Debeini wata nakri, “Ipak pukutishukuk punak pupeik sik. Mare pupe pusuhw eshudok douk eik yatrish yakri shanabosusih iri, aria eik ta iraep pupe eikish arpesh.



18 Eik ta ipe ipakin Yain aria ipak pupe eikish batowish. Eik Dodogoiwe abom atuwe Debeiwe iri yakri namudok.”

## 7

<sup>1</sup> O ipak abom eikish arpesih, Iruhin douk nowem um enyudok iganigadae yakri pep-enyi adurin atinyi baraden um apak. Namudok aria apak munagapesh um apak kanak mukwreik ihishumori eneshenesh yoweishi inahos. Eshudok yoweishi inahos douk apa shenek apakiruh yegeshiweruh aria mishish shanabosusih shape yowesh iri. Apak ta munogugur mupe shakamum Iruhin aria dodogowip atup um munek yopihi abom aih agundok Iruhin nutrup um.

### *Pol Nanadudareh Um Eshesh Korin Shatanam Shakon Aparuh Iruhin*

<sup>2</sup> Apak douk madae munek enesh yoweishi inahos um enen ipak Korin uwe, uwok. Madae mununu enen uwe. Madae munek roh w um enen munaruken enesh eshudok eneshenesh meyoh abom uwe, uwok. Namudok aria apak makri ipak ipak urkwip ta punawasham apak. <sup>3</sup> Mnek, eik douk madae ikri enyudok baraden um ikep agab ipak uwe, uwok. Douk yakri, apak ipak urkwip douk panasuhw ipak abom. Mugok o watak mupe um, apak ipak urkwip ta panawashamep abom namudok atin. <sup>4</sup> Eik apa yanadudareh yariguk um ipak. Yadukemesh um ipak ta punek yopinyi atin. Aria douk yatuk ipakish nyeiguhw shato iruhw. Enyudok ihinyumorim amaen nyatogrupap, aria eikihw apahw douk madae yowehw uwe, uwok. Yanadudareh abom yariguk.

<sup>5</sup> Abudok nyutob matogur mape agudok shokugi nahobig Masedonia obi nyutob, apak douk madae mupe um muraio uhwin aria aparuh hur wosik uwe, uwok. Mape agundok aria enenyenen amaen nyape um nyatogrumap sabaih atih. Shanaki shani ipak panitok baraen. Apakish mishish yowesh abom aria manogugur. <sup>6</sup> Aria meishi arpesch douk aparuh apa yoweruh iri, Iruhin apa nenekesh shape wosik shanadudareh. Douk anan neshopok Taitus nanaku aria namudok anan Iruhin douk nenek apakiruh aparuh wata hor wosik manadudareh. <sup>7</sup> Apak douk madae aparuh hur wosik um agundok Taitus nanak um atin uwe, uwok. Anan douk nakripesh um agundok ipak penek ananihw apahw hor wosik um. Apak memnekesh namudok aria aparuh hor wosik. Nakripap um agundok ipak pakri abom um putik eik um. Um agundok ipak aparuh yoweruh um riguk ipak penekume anah aih aria eikihw apahw yowehw um. Nakripesh-umep um agundok sheneyagwreh enenyenen um eik aria ipak panawasham eik um. Nakripesh um ipak namudok aria eik douk yanadudareh abom yariguk.

<sup>8</sup> Eik yadukemesh. Yarik yenekap iri shup douk penekep ipakiruh aparuh yoweruh. Aria eik madae urkum yowem um agundok ipak aparuh yoweruh um uwe, uwok. Adur, riguk douk wosik eikim urkum yowem, aria douk uwok. Yadukemesh um, apudok shup penekep aparuh yoweruh aria parao abraen. Aria ipak douk aparuh yoweruh banab nyutob meyoh.

<sup>9</sup> Aria douk yanadudareh. Yanadudareh um douk madae inanadudareh um agundok ipakiruh aparuh yoweruh um uwe, uwok. Eik douk yanandudareh um maresh? Ipak douk aparuh yoweruh parao abraen. Douk namudok aria ipak pekeshuk agabus abom penekesh iri yoweishi inahos aria pakon aparuh Iruhin. Enyudok douk Iruhin meyoh nakriyen um nutaurumep aria douk nyatogrumep. Apak kanak douk madae munekumep enesh yoweishi inahos uwe, uwok. <sup>10</sup> Agundok Iruhin nunekap aparuh yoweruh muraao abraen um douk nenekumap um mukutishuk abom apak menekesh iri yoweishi inahos. Makutishuk aria anan wata narap matanamori mape wosik abom. Namudok aria enyudokmori nyukri nyutogrumap um, apak mare mukri aparuh yoweruh, uwok. Aria agundok eshesh haiden aparuh yoweruh shuraao abraen um douk apa nyenekesh shagok. <sup>11</sup> Ipak gamo urkwip purum agundok Iruhin nenekep aparuh yoweruh um. Enyudok douk nyatogur nyakwarum-umep sabaihi yopihi aih. Enyen douk enyudokmori. Iruhin nenek gihaumep aria pakitak pagapesh enyudok ipakin baraen. Nepuhur pakitak pasuhw anudok douk nenek yoweishi inahos iri aria nenekep panogugur um Iruhin iri. Douk ipak pakri abom um puni apak mupe aturuh aparuh. Dodogowip atip pagapesh anudok douk nenek yoweishi inahos iri anan aih. Ihimorim aih penekesh um pugapesh eshudok yoweishi inahos iri douk nyeyabigap wosik abom um ipak adur madae enesh yoweishi shupenyap uwe, uwok. <sup>12</sup> Riguk yeneku apudok shup

um, eik douk madae inekapumagu itaurum um anudok nenek yoweishi inahos iri o anudok douk anan nenekuman yoweishi inahos iri uwe, uwok. Eik douk yenekapumagu yakri ipakih aih huto-gur yopugunum Iruhin nutrip aria ipak gamo pudukemesh um ipak douk urkwip panawasham apak abom. <sup>13</sup> Douk namudok aria apak aparuh hor wosik manadudareh mape dodog.

Aria shopunek apak douk manadudareh mariguk abom um agundok ipak ihishmorim pagapesh-uman apahw Taitus aria penekan nanadudareh nariguk um. <sup>14</sup> Aria Taitus, eik douk yakripan um agundok eik yanagunukuk um ipak um ipakih yopihi aih. Aria ipak douk madae puneke irao abraen um agundok yanagunukuk um uwe, uwok. Ihinyumorim baraen yakripan um ipak um douk adurin atin. Aria douk namudok atin. Douk Taitus nadukemesh um, enyudok baraen apak managunukuk um ipak um douk adurin atin. <sup>15</sup> Abudok nyutob anan nanak natogrumagu ipak obi nyutob, ipak douk paran aria pemnek ananin baraen pagipeshen wosik abom. Abudok nyutob, ipak douk panogugur abom um pakri ta putauruman ba yowen um aria Debeini nutrip nukri ipak penek yoweishi inahos. Douk anan wata urkum mor namudok aria ananim urkum manawashamep abom neshagrakuk kabi riguk um. <sup>16</sup> Douk eik Pol yanadudareh abom. Um maresh? Eik yadukemesh abom um ipak ta punek yopihi atih aih abom.

## 8

*Eshesh Korin Shatorum Utabor Um Shutaurum Iruhin Ananish Arpesh Shape Judia Iri*

<sup>1</sup> O ipak eikishi arpesh, apak douk makri mukripep aria pudukemesh um agundok Iruhin nenekumesh yopinyi abom eshesh ananish arpesh douk shape ihirub warub agudok shokugi nahobig Masedonia iri. Anan douk nataurumesh meyoh. <sup>2</sup> Debeinyi amaen nyatogrumesh, aria enyudok douk nyataurum esheshih aih abom um bilip. Aria eshesh douk shapeum shanadudareh shariguk. Adur, eshesh douk eshudok yaruhish abom, aria shanadudareh namudok aria shatorum debeibori utabor um shutaurum eshudok enesh Iruhin ananish arpesh. <sup>3</sup> Adur atin yakripep. Eshesh douk sheyakabor shaborubuk sheshagrakuk abom mak douk eshesh ta shukesh um. Apak douk madae dodogeship-umesh um shiyakabor namudok uwe, uwok. Eshesh meyoh sheneken. <sup>4</sup> Eshesh douk shakri abom um shutaurum eshesh Iruhin ananish arpesh shape agudok shokugi nahobig Judia iri. Namudok aria shabuk utabor iyoh aria dodogeshish um apak murabor-umesh. <sup>5</sup> Eshesh douk shaborubuk abom beshagrakuk kabi apak makri ta butogur um. Aria eshesh douk madae shubuk utabor atabor uwe, uwok. Sagomatin eshesh sharik shakon eshesh kanak Debeini shor ananis wis. Douk shenek enyudok iyoh, aria shagipesh kabi Iruhin nakri um shanaki shemnek apakin baroen shasuhwen shagipeshen. <sup>6</sup> Riguk douk Taitus nanaku narik nohur enyudok mour um patorum

utabor pataurum kupaishi um. Aria douk wata dodogeship-uman um nunaku nutaurumep piyatak enyudok mour um putaurum kupaishi meyoh um. <sup>7</sup> Ipak douk peshagrakuk kupaishi Iruhin ananish arpesht um ihimorim yopihi aih. Peshagrakuk um agundok pasuhwen Kraiss ananin baraen dodog um, um agundok pakripesh Debeini ananin baraen um, padukemesh um Iruhin ananin baraen wosik um, mishish shakitak um punek Iruhin ananin mour um. Aria shopunek peshagrakuk um agundok ipak urkwip panawasham apak abom um. Aria douk, apak makri ipak ta pishagrakuk abom shopunek um agundok putorum utabor aria putaurum Iruhin ananish arpesht meyoh um.

<sup>8</sup> Enyudok douk madae ikripep enen dodogowinyi baraen um ipak pugipeshen uwe, uwok. Eik atin yakri ikripep um pudukemesh um agundok kupairubi warubish Iruhin ananish arpesht mishish shakitak abom um shutaurum kupaishi um. Um yakri ikwiraehep aria idukemesh um ipak urkwip panawasham eshesh shape Judia iri pekesh peshagrakuk kupaishi shekesh um o eshesh sheshagrakuk ipak. <sup>9</sup> Ipak douk padukemesh um agundok apakini Debeini Jisas Kraiss urkum manawasham apak abom aria nataurumap meyoh um. Anan douk nagrem sabaishi yopishi eshudok eneshenesh abom iri, aria wata nakutukuk ihishmorim eshudok natogur anan yaruhish um eshudok iri arman um nutaurum ipak. Natogur yaruhish um eshudok iri, um nutaurum ipak purao sabaishi Iruhin ananish yopishi eshudok eneshenesh aria pupe

wosik.

<sup>10</sup> Douk yakri ikripep eikin baraen um agundok utabor bunotorum um. Nyanyik enen kwar, sagomatin ipak parik mishish shakitak um punek enyudok mour aria douk parik peneken. <sup>11</sup> Namudok aria douk yakri wosik ipak dodogowip atip um punek enyudok mour piyaten. Enyudok mour douk sagomatin ipak mishish shakitak um puneken aria douk penyuhur nyape iri. Ipak paborubuk mumam, utabor aria pusiabor namudok kabi panaborubuk um. <sup>12</sup> Arpesh douk enesh eshudok eneshenesh shakus aria mishish shakitak abom um shuko Iruhin um, Iruhin apa nanadudareh um nunatrish eshudokmori eneshenesh. Anan madae nirik atin um shukon eshudok douk eshesh wokesh um uwe, uwok. <sup>13</sup> Eik douk madae ikri um ipak piyak ihibormorim ipakibor utabor puko eshudok yaruhishi arpesh, um eshesh shupe wosik aria ipak wata eshudok eneshenesh wokep, namudok uwok. Eik yakri um mutaur-umesh um eshesh apak mupe arag atin. <sup>14</sup> Douk, ipak patik eshudok aria ipak wosik putaurum eshudok yaruhishi arpesh. Namudok douk nuhut biyen ipak pakri punak pubuhuk eshudok wokep aria eshesh shutik eshudok um, eshesh douk ta wata shuwanamep ipakish. Douk punabiram namudok aria ta pupe arag atin. <sup>15</sup> Enyudok douk kabi baraen nyetem Iruhin ananik Buk iri nyakrium. Nyakri namudok. “Arpen nyanatorum sabaishi eshudok eneshenesh iri douk ta wosik-umen abom. Mare enesh shukusuk meyoh uwe, uwok. Enyudok enen arpen douk nyanatorum karowish iri,

eshesh douk wosik-umen. Mare ta shutuh uwe.”

*Pol Nakrip Taitus Nani Anam Hanakum Korin*

<sup>16</sup> Eik Pol douk yanadudareh abom um Iruhin. Yenek tenkyuman um agundok nohur Taitus aria anan mishin nyakitak abom um nakri nutaurum ipak Korin. Nakri nutaurumep kabi eik yakri itaurumep um. <sup>17</sup> Apak marigan um nunaku nutik ipak obi nyutob, anan douk nakri wosik. Um maresh? Anan mishin nyakitak abom um nutaurumep. Aria douk anan meyoh nanagraeh um nunaku nutrip. <sup>18</sup> Apak douk meshopok anan um apak Iruhin ananip um nanamanugu. Anudok arman douk nyeigur nyato iruhuman um nakripesh Iruhin ananin yopinyi baraan wosik. Ihishmorim Iruhin ananish arpesih hirub warub douk shatuk ananin nyeigur nyato iruhw. <sup>19</sup> Aria douk madae namudok atin uwe, uwok. Anarub warubish Iruhin ananish arpesih douk shograehan um nini ipak purahaen aria nutaurumap um enyudok mour um mutorum utabor munak mutaurum yaruhish um. Apak douk munek enyudok mour um Debeini anan kanak nurao debeinyi nyeigur. Aria shopunek um miyabig arpesih um agundok apak mishish shakitak abom um mutaurum Iruhin ananish arpesih douk yaruhish iri. <sup>20</sup> Apak douk gamo mudukemesh abom um agundok masuhw abrudok debeibori utabor douk ipak pani kupaishi paborubuk um putaurum kupaishi um. Makri ta enesh shunekap baranyum-abor. Namudok aria meshopok anudok arman nani Taitus hanamepogu. <sup>21</sup> Apak douk makri abom um munek yopihi atih aih. Aria makri uwok um munekeh



agundok Iruhin ananis nabes atus um, uwok. Makri munekeh wosik atin um yopihi atih aih um arpesh shopunek shutrih.

<sup>22</sup> Apak douk moshopok anudok anan apakin ashuken um neiram shopunek. Sabaihi apak mograehan um enenyenen mour aria matik um anan wosik dodogowin aria mishin nyakitak neneken. Anan douk nadukemesh um ipak ta punek yopihi atih aih. Namudok aria douk anudok mishin nyakitak abom um nunek enyudok mour nishagrakuk agundok riguk anan mishin nyakitak neneken um. <sup>23</sup> Taitus ipak douk padukeman. Anan douk nani eik wanoprom wenek Iruhin ananin mour wataurum ipak iri. Amudok anam apakimi heiranogu iri armam, amam douk hanagraeh harao nukwatog um sabaishi Iruhin ananish arpesh douk shape anarub warub iri. Amamih aih douk apa henekeh aria arpesh shatrih shatuk Kraiss ananin nyeigur nyato iruhw. <sup>24</sup> Namudok aria eik yakri ipak Korin ta punekumam yopihi aih amudok biom atun armam. Um yakri kupairubi warubishi Iruhin ananish arpesh shutik namudok aria shudukemesh abom um ipak douk urkwip panawasham amam. Namudok aria eshesh ta shudukemesh um agundok apak manadudareh um ipak um douk madae munek roh wuwe, uwok.

## 9

*Iruhin Ananish Arpesh Shape Korin Iri Ta Shubuk Utabor Um Shutaurum Eshudok Enesh Iruhin Ananish Arpesh*

<sup>1</sup> Ipak douk padukemesh um agundok utabor banatorum um, um putaurum Iruhin ananish arpesh shape agudok shokugi nahobig Judia iri um. Namudok aria eik ta mare iwemagu rounyi baraen um enyudok, uwok. <sup>2</sup> Um maresh? Eik yadukemesh. Ipak douk mishish shakitak um putaurum kupaishi Iruhin ananish arpesh. Yani eshesh Masedonia mape obi nyutob, eik apa yanadudareh um ipak Korin yakripesh yakri, “Yaipo, eshesh agudok shokugi nahobig Akaia douk nubokuhiyen kwar meyoh shenek garibog shapeum enyudok mour.” Douk eshesh Masedonia shemnek namudok um ipak Korin oub bakitak um putorum utabor putaurum eshudok yaruhish um, aria enyudok nyahuresh mishish sabaishi shopunek um shakri shubuk utabor shataurum kupaishi. <sup>3</sup> Aria eik douk yakri uwok um enyudok apak meyagwreh-enyi baraen um manadudareh um ipak um nyunak nyubouk atap meyoh, uwok. Yakri ipak punek garibog pupe um amudok apakimi hunak hutogur aria pukomi eshudok kabi yakripamugu um. Namudok aria douk enyudok yeshopokam hanaku. <sup>4</sup> Apak douk madukemesh um ipak douk penek garibog pape um pukesh utabor eshudok yaruhish. Yakri namudok douk ta enesh Masedonia shukri shiramugu aria shutrip um mare punek garibog uwe, aria apak ta muraoumep abraen. Aria ipak shopunek ta purao abraen. <sup>5</sup> Namudok aria yakri wosik um ishopokugu amudok biom atun apakimi hurik hunaku. Yakri hurikumogu hataurumep punek garibog um yopishi eshudok eneshenesh douk riguk ipak parik pakri adurin

atinyi baraeen um peshopokesh shunak um eshesh Judia iri. Yakri eik ikri inak itogragu aria eshudok douk pugapeshesh shukus. Um yakri arpesh shutik namudok aria shukri apak madae dodogowip um ipak putorum utabor uwe, uwok. Ipak panadudareh meyoh aria paborubuk.

<sup>6</sup> Ipak urkwip gamo purum enyudok baraeen. Arpen nyu karowigun worigun iri ta wata nyunarok karowigun. Arpen nyu sabaiguni iri ta nyunarok sabaiguni. <sup>7</sup> Namudok aria yakri ipak atin atin ta gamo punek urkum aria ipak kanak mishish shukitak um pakri pukesh mumam mumam. Ipak mare aparuh yoweruh o kupaishi dodogowish aria douk pukesh, namudok uwok. Um maresh? Iruhin apa urkum manawasham arpesh douk eshesh meyoh mishish shakitak aria shanadudareh um shukon eshudok iri. <sup>8</sup> Aria Iruhin anan douk wosik um ta nukep ihishmorim abom yopishi eshudok aria ipak ta pusuhw sabaishi abom. Namudok aria ihih nyumneh ipak ta pugrem ihishmorim eshudok eneshenesh. Aria enesh ta shutourak shukus meyoh um punek ihinyumori enenyenen yopinyi mour. <sup>9</sup> Kabi Iruhin ananin baraeen nyetem ananik Buk iri nyakrium. Nyakri namudok.

“Arpen douk nyukesh sabaishi yopishi enesh-enesh eshudok yaruhish arpesh iri, enyudok arpen enenyih yopihi aih ta mare hunak huwishuk, uwok. Ta hupe ihih nyumneh.”

<sup>10</sup> Iruhin apa nakop mawagun iri worigun mawagun. Wata nakop mashoh iri mashoh. Aria

anan ta nukop ihishmorim shunuwesh iri wori-gun ipak puwesh aria ta nunekesh shutogrume. Aria namudok atin. Anan ta nukep eshudok ipak ta pugremesh aria putaurum sabaishi kupaishi arpesh. <sup>11</sup> Anan ta nupe um nutaurumep putik sabaishi eshudok um ipak wata pupe um sabaibi nyutob putaurum eshudok yaruhish arpesh. Namudok aria sabaishi arpesh ta shunek tenkyu um Iruhin um ipakish yopishi eshudok douk pukop masuhwesh manak makeshesh iri.

<sup>12</sup> Enyudok peneken iri mour douk madae puneken um putaurum Iruhin ananish yaruhish arpesh atish uwe, uwok. Enyen douk shopunek peneken um sabaishi arpesh shutrin shutuk Iruhin ananin nyeigur abom aria shunek tenkyuman shuriguk. <sup>13</sup> Enyudok ipak peneken iri mour um putaurum yaruhish um, enyen douk ta nyuwereh ipakih yopihi aih. Aria eshesh ta shudukemesh shukri enyudok ipak pasuhwen pagipeshen iri Krai ananin yopinyi baraden douk pagipeshen wosik abom. Ta wata shutik sabaishi eshudok ipak poko eshesh shani ihish arpesh um, aria eshesh ta shutuk Iruhin ananin nyeigur nyuto iruhw. <sup>14</sup> Aria ta shudukemesh shukri Iruhin nutaurumep meyoh abom nenekumep yopinyi. Namudok aria eshesh ta urkwip punawashamep aria shorik Iruhin um nunekumep yopinyi. <sup>15</sup> Apak ta munek tenkyu um Iruhin. Um maresh? Anan douk nakopari ananin sagomatinyin yopinyi abom presen. Enyen douk ananin Nuganin. Aria apakin baraden douk madae wosik um munakripesh um enyudok yopinyi presen uwe,

uwok.

## 10

### *Pol Nawanamesh Baraen Eshudok Shakri Shunumogesh Ananin Mour Iri*

<sup>1</sup> Enesh ipak Korin apa shakri abudok nyutob eik yani ipak mape obi nyutob, shakri eik apa yaunih eik kanak. Aria shakri abudok nyutob yanak yapeik kupaigunum obi nyutob, shakri eik apa yenekumepogu shup yakripep dodogowinyi atinyi baraen. Aria douk yakri ipak urkwip purum ehudok Kraish ananin yopihi aih um nunih anan kanak aria neyagwreh shokwin baraen um. Eik douk yakri igipesh ehudok atih aih aria douk yarigep um pumnek eikin baraen. <sup>2</sup> Aria douk yakri ikripep um gamo pudukemesh. Ikri inak itogrumogu, eik yakri ipak mare puneke dodogeshiwe atuwe ikripep dodogowinyi baraen, uwok. Eshudok enesh douk shakri apak mape um magipesh eshudok arpesh douk madae shudukem um Iruhin iri uwe esheshih aih iri, eik adur yakri um ta dodogeshiwe atuwe ikripesh dodogowinyi baraen. <sup>3</sup> Adur, apak douk mape agundok atap. Aria ahwudok wanohw douk marpokohw um mubouk enesh-enesh yoweishi inahos, apak douk madae murpokohw kabi eshudok madae shudukemesh um Iruhin iri um uwe, uwok. <sup>4</sup> Eshudok douk masuhwesh marpak ahwudok wanohw iri douk mare mukwu enesh agundok atapishi wanohwishi eshudok eneshenesh uwe, uwok. Makwu Iruhin

ananish dodogowish abom atishi eshudok enesh-  
enesh aria menekohw. Eshesh douk dodogow-  
ish atish abom wosik um shubo Satan ananish  
dodogowih atihi yoweihi aih hubuhuk. <sup>5</sup> Enesh  
Satan ananish arpesih shani anan apa shatapok-  
umesh yah eshudok armam armago douk shakri  
shurao saki um Iruhin iri. Aria apak dodogowip  
marpokuk yah um mubouk ihishumori esheshin  
baraen nyani esheshih aih. Apak apa motapok  
ihipmori arpesih urkwip aria apa mataurumesh  
mohur esheship urkwip um urkwip pur wosik  
abom aria shugipesh Kraiss atun. <sup>6</sup> Apak wata  
mape meshukabar um ipak pusuhw ihinyu-  
morim Iruhin ananin baraen pugipeshen iyoh.  
Douk ipak pugipeshen iyoh aria abudok nyu-  
tob ihishmorim eshudok douk shaken agabus  
baraen iri, apak ta mare mukri wosik umesh  
uwe, uwok. Ta mukripesh dodogowinyi baraen  
um mare shuwish shupe shuni Iruhin ananish  
arpesih shunek lotu atugun uwe, uwok.

<sup>7</sup> Ipak patik aduk eikihw yegenyihw aria pakri  
eik douk madae dodogowini arman uwe. Aria  
douk yakri. Ta ipak enen arpen nyukri enyen  
douk adur nyenek Kraiss ananin mour iri um, aria  
eik yakri enyen nyigim eik nyunek urkum. Apak  
douk shopunek munek enyudok Kraiss ananin  
mour atin kabi enyen um. <sup>8</sup> Debeini Jisas Kraiss  
douk nakop big aria natrup um mupe debeipi um  
ipak mutaurumep. Nakri uwok um mukwu enyu-  
dok big aria munekep pubuhuk, uwok. Nakri  
mutaurumep piyotu dodogowip atip um bilip.  
Namudok aria ta eik ikri inadudareh iriguk um  
namudok akure, eik ta mare abraen nyupeye,

uwok. <sup>9</sup> Aria eik yakri ipak mare punek urkum pukri shup eik yape yenekap iri douk yeneka-pumagu inek ipak punogugur, uwok. Mare punaruk urkwip namudok. <sup>10</sup> Ipak enep apa pakri namudok. Pakri, “Anudok Pol nenekap iri shup douk nowemori enenyenen dodogowin atinyi baraen nyetem iri. Aria abudok nyutob nani apak mape matrun um, anan douk madae dodogowin abom uwe, uwok. Neyagwreh enyi baraen shopunek ta mare nyutaurumap uwe.” <sup>11</sup> Peyagwrehume enyudok iri douk yakri pudukemesh. Enenyenen baraen mape rougun menyemagu shup iri douk padukemen. Meibi nyutob mukri munaku muni ipak mupe obi nyutob, aria aih apak munekeh iri ta wosik abom um baraen douk marik menyemumep-ogu shup iri.

<sup>12</sup> Apak makri uwok abom um mukri apakih aih douk kabi eshudok arpesh douk apa shatuk esheshish nyeiguhw shato iruhw iri, makri uwok. Eshesh apa shanatutik um aria shenek skelim esheshih aih um shadukemesh eshesh shape mumam. Shagipesh esheship urkwip atin aria shenek skelimum eshesh kanak. Eshudokmori arpesh douk shenek dehik abom iri. <sup>13</sup> Apak ta mare munagunukuk mishagrakuk enyudok kak douk Iruhin nako apak munek enyudok ananin nakopen iri mour munak miyotu um, uwok. Apak ta muneken munak miyotu agundok Iruhin nakripap-enyi kak atin. Aria apak ta muna-gunukuk um enyudok atin mour douk meneken arigaha manak matogromagu ipak agundok Korin iri atin. <sup>14</sup> Riguk apak manaku nagundok Korin aria makripep Jisas Kraiss ananin

yopinyi baraeen. Aria abudok nyutob manakumagu ipak um, apak douk madae mishagrakuk Iruhin ananin kak uwe, uwok. Ipak Korin douk parik iri um abudok amnab douk Iruhin nako apak um munek mour munak mutogur um. <sup>15</sup> Aria apak madae munagunukuk um enyudok mour douk kupaishi sheneken aria sheshagrakuk enyudok kak douk Iruhin nakop um apak iri uwe, uwok. Apak apa munek Iruhin ananin mour wosik atin. Um makri ipak ta pusuhw Kraiss ananin baraeen dodog pishagrakuk agundok riguk parik pasuhwen pagipeshen um. Namudok aria apakin mour ta nyutogur deben agundok. <sup>16</sup> Aria abudok nyutob, apak ta kadak munak mukripesh Iruhin ananin yopinyi baraeen arbudok rougunirub warub douk bape bagigukmori ipak iri. Apak ta mare munak arbudok anarub warub douk kupaimi hanak henek mour arub iri, uwok. Um maresh? Apak douk makri uwok um munagunukuk um enyudok mour douk amam harik hanak henekenyuk iri. <sup>17</sup> Kabi enen baraeen nyetem Iruhin ananik Buk iri nyakrium. Nyakri, “Arpen nyukri nyunagunukuk um enesh eshudok eneshenesh iri, enyen ta nyunagunukuk um Debeini atun.” <sup>18</sup> Umum maresh? Apak madukemesh. Debeini natik arpesh douk shatuk esheshish nyeiguhw shato iruhw iri um, anan nakri eshudok arpesh douk nyeiguhw wokes. Aria arpesh douk Debeini nutrish nuhwares. Yopishi iri, eshesh adur nyeiguhw shato iruhumesh abom.



# 11

*Pol Nenekehi Aih Douk Madae Atatahah Um Ehudok Aih Amudok Henek Rohw Iri Aposel Henekeh Iri Uwe.*

<sup>1</sup> Eik Pol yakri ipak gamo punnek enen shop-unek enyudokmori baraan. Eik ta iyagwreh kabi rohwise sheneyagwreh um. Enyen douk rohwinini, aria yarigep um bubuk arigos. <sup>2</sup> Eik douk urkum mor abom um ipak kabi Iruhin anan urkum morumep um. Eik yakri ipak punatukur Kraisa aria pupe ananip atip. Ipak douk eik meyoh yakripep baraan um Kraisa aria yataurumep yaraepuman. Yaraepuman kabi yarae onok kwape wosik abom iri weroroikwi armatok kwanak um raminen um nuraok iri um. Anan douk Kraisa. <sup>3</sup> Arudok yur Satan douk radukemesh atin abom um agundok shenek rohwi um kupaishi um. Seiwok sagement renek rohwi um Eva aria eik douk yanogugur um ipak. Yakri ta runekeshumep namudok atin aria urkwip pushukepuk. Yakri ta mare pukutukuk agundok pape wosik abom aria urkwip purum Kraisa atun um. <sup>4</sup> Apak douk manaku makripep adurini baraan atin um Jisas. Aria anam wata hanaku hakripepuk enen kupaini baraan um Jisas. Douk pemneguk amamin baraan pasuhwen aria parae enen kupaini mishin. Enyudok mishin douk madae nyudukem enyudok Iruhin ananin Mishin riguk parik parae iri um uwe, uwok. Iruhin ananin yopini baraan douk pape um parae enen kupaini. Madae nyudukem enyudok apak marik makripepen iri um uwe, uwok. Aria douk yadukemesh. Abudok nyutob amam hanaku

hakripep amamin baraen obi nyutob, ipak douk panadudareh pape um pumnekam. <sup>5</sup> Ipak mnek. Eik yadukemesh um, amudok anam aposel douk ipak pahwaram debeimi abom iri, amamin saki nyani aih douk madae shishagrakuk eikish uwe, uwok. <sup>6</sup> Aria eik madae gamo iyagwreh wosik um uwe, nyenekesh. Aria eikin saki douk deben. Ihih nyumneh ihihmori menekeh iri aih, apak douk mayabigep patrih aria padukemesh wosik. Padukemesh um agundok apak madukemesh mariguk um.

<sup>7</sup> Ipak douk padukemesh. Eik yakripep Iruhin ananin yopinyi baraen aria madae ihwarep um irao utabor um enyudok mour uwe, uwok. Eik yenekesh namudok yaunih eik kanak um ituk ipak puto iruhw. Aria douk mumam? Ipak pakri eik yenekesh namudok aria yenek yoweishi inahos aka? Adur atin uwok. <sup>8</sup> Abudok nyutob yanaku yani ipak mape aria yenek mour yataurum ipak obi nyutob, eik douk kupairubi warubish Iruhin ananish arpeshe shataurume sheke utabor. Aria namudok douk kabi yakwumabor aruh esheshibor utabor um itaurum ipak um. <sup>9</sup> Abudok nyutob yani ipak mape aria utabor uwok um enesh eshudok eneshenesh obi nyutob, eik douk madae dodogoiwe ipeum enen ipak um nyukeyesh uwe, uwok. Eik douk amudok anam apakimi armam hapei agudok shokugi nahobig Masedonia aria hanaki iri atum apa hataurume um ihishmori eshudok eik urkum makriyesh iri. Kabi riguk um, douk arigaha kweipon eik ta mare iwemep enen enyudokmori amaen, uwok. <sup>10</sup> Eik douk enyudok Krai ananin adurin atin

baraen nyapenye aria douk yakri adurin atin. Ihirub warub agudok shokugi nahobig Akaia, ta mare enesh arpes shunek eikit nokwat tishuk um agundok iyagwreh um, uwok. Yape um yakrip ipak pani sabaishi arpes enyudok Iruhin ananin yopinyi baraen meyoh. Eik madae irikep um puke enesh eshudok eneshenesh uwe, uwok. <sup>11</sup>Ipak pakri eik yeyagwreh enyudok um maresh? Aria pakri eik urkum madae munawasham ipak uwe? Adur atin uwok. Iruhin nadukemesh um eik urkum manawashamep abom.

<sup>12</sup> Aria ehudok yenekehi aih um agundok yakripep Iruhin ananin baraen aria madae inatrip anabor utabor um uwe, eik douk ta ipeum igipesheh. Yakri inekesh namudok um amudok anam aposel hutik aria yah wokam um hunagunukuk hukri amam douk henek mour kabi apak meneken um. <sup>13</sup> Amudokmori armam douk henek rohwi iri aposel. Amam madae husuhw Debeini ananin mour wosik iri uwe, uwok. Apa habeshuk amamih yoweihi aih aria henek rohwi um arpes hakri amam adur Krai nahwaram aria hanak hakripesh ananin baraen iri. <sup>14</sup> Aria ipak mare pikitak yowiyokuk um amamih aih, uwok. Ipak douk padukemesh. Satan anan kanak apa nabeshuk ananin yoweihi aih aria nawishi enen Iruhin ananin nyatrugun abom iri ensel. <sup>15</sup> Aria henek mour um Satan iri hunabeshuk amamih yoweihi aih aria hunek rohwi hukri amam adur henek mour um yopihi aih iri um, apak douk mare mukitak yowiyokuk um amam, uwok. Kweipon amam ta hurao yoweihi poe wosik um ehudok amam henekeh iri aih.

*Pol Nanagunukuk Um Nasuhw Debeini Ananin Mour Aria Sabainyi Amaen Nyatogruman Um*

<sup>16</sup> Wata gamo ikripep. Eik douk yakri uwok um enen arpen nyumnek enyudok eikin baraen aria nyukri eik douk um yenek rohwi iri arpen, uwok. Aria ta ipak pakri eik douk yenek rohwi iri um, enyudok wosik. Aria yakri ipak ta puku-tukuk eik ba gamo inagunukuk um eik kanak.

<sup>17</sup> Adur, enyudok douk iyagwrehe iri baraen um inagunukuk um eikin mour um, eik douk madae iyagwrehe igipesh Debeini ananim urkum uwe, uwok. Yeyagwreh kabi anan nenek rohwi iri.

<sup>18</sup> Sabaishi arpeshe douk shagipesh enyudok um madae shudukem Iruhin iri uwe esheshih aih aria shanagunukuk shatuk esheshish nyeiguhw shato iruhw. Douk eik shopunek ta igipesh ehudok atih aih aria inagunukuk.

<sup>19</sup> Ipak douk wosik gamo padukemesh iri armam armago. Namudok aria ipak pakri wosik abom um punnek rohwishih esheshin baraen.

<sup>20</sup> Arpeshe shunekumep enyudokmori um, ipak apa pakri wosik. Enyudokmori. Shunekumep enyudok kabi shonoweshik iri arpeshe um, shiyatokumep enesh ipakish eshudok eneshenesh um, shunek rohwi um, enesh eshudok eneshenesh um, shuhwarep shokwipari eshesh debeishi um, shuboumep ipakigos yamagos um. Shunekumep enyudok-morim um, ipak apa pakri wosik pape panatrish meyoh.

<sup>21</sup> Eik Pol douk abraenyiwe um yeyagwreh namudok um. Um agundok yakri apak madae dodogowip um munekumep kabi baraen iganigadae yakriyen iri um. Kabi douk amudok henek rohwi iri aposel henekenyumep iri um.

Aria ta amam hupe um hunagunukuk um enesh eshudok um, eik douk shopunek ta inagunukuk kabi amam um. Douk enyudok yeyagwrehenyuk kabi rohwiimi iri um. <sup>22</sup> Amudok aposel hakri amam douk Hibru? Eik shopunek anan arpenyin um Hibru. Aria amam douk Israel um, eik shopunek anan arpenyin um Israel. Aria amam hakitak Abraham ananip awirop um, eik douk shopunek yakitak apudok atup awirop. <sup>23</sup> Amam douk hasuhw Krai ananin mour iri aka? Douk yakri iyagwreh kabi shagugak iri abom um. Eik douk yeshagrakuk amam um agundok yenek Krai ananin mour um. Adur abom yeshagrakuk amam yenek debeinyi mour. Yeshagrakum um agundok showeshike yeshuh shunuweshik-ati urupat sabaih atih um. Yeshagrakuk amam um agundok shae shoreye eshudok sabaih atih um. Yeshagrakuk amam um agundok shae sabaih atih hurukatin um igok um. <sup>24</sup> Eshesh Juda douk shoreye enesh wanohwishi eshudok um 39-poreih. Enyudok douk nyatogrume 5-poreih sisigih nyumneh. <sup>25</sup> Biyeh atih sisigih nyumneh eshesh Rom shakwume rowos. Anah eshesh Juda shakwume utabor. Bioh atih sisigih nyumneh yara haen owi kroruhiyor yoweu wagrakuk youg. Aria anah um ahudok nyumneh douk yeyom yor youg um anah nyumnah shuknih wab arigaha gagrak ruwahepih. <sup>26</sup> Sabaihi nyumneh yara haen atin. Yara haen worubus sau hurukatin um se igok. Armam hanabeshuk yeh hanatrish eshudok eneshenesh iri hakri um he hunatiwe eshudok eneshenesh. Eikishi bauges eshesh Juda shopunek shakri um

she igok. Kupairubi warubishi eshesh madae Juda uwe namudok atin shakri she igok. Yawish debeirubi warub shakri um she igok. Yarahaeik wehigunum arpesh uwok um anam hakri he hunatriwe eshudok eneshenesh. Youg yoweg hurukatin um inak iwishuk. Anam eik kanak eikim heyagwreh rohwin baraen hurukatinum he igok. <sup>27</sup> Yenek dedeben atinyi mour um inaparg eshudok eneshenesh. Yape um yenekesh namudok aria sabaibusi weibus madae ishuh atin uwe. Nyurub bae yape. Abar bae. Sabaihi madae iwok worigun uwe. Sabaihi nyumneh nyumanugas sae yape. Inekhe iri rupeh madae eneh uwe. <sup>28</sup> Sabainyi kupainyi enyudokmori amaen douk nyatogrume. Aria ihih nyumneh eik douk shopunek yenere urkum um ihishmorim Iruhin ananish arpesh shape ihirub warub iri. Yakri eshesh ta shupe wosik o mumam? <sup>29</sup> Eik douk urkum mor abom um eshudok douk madae dodogowish um bilip iri uwe. Apa yemnek um amaen nyatogur um eshesh iri douk kabi nyatogur um eik um. Aria abudok nyutob eneh aih hutogur hunek enen Iruhin ananin arpen nyunek enesh yoweishi inahos obi nyutob, eik douk juwehosiwe um ehudokmori aih abom yakri wokumeh.

<sup>30</sup> Aria eik ikri inagunukuk akure, aria eik ta inagunukuk um eshudok atish, douk shatogrume aria sheyabigap um agundok eik madae dodogoiwe um uwe. <sup>31</sup> Anudok Iruhin apakin Debeini Jisas Krai ananin Yain, apak ta mutuk ananin nyeigur nyuto iruhw ihih nyumneh. Anan douk nadukemesh um enyudok

eik yeyagwreh-enyi baraen douk adurin atin.  
<sup>32</sup> Riguk yape numun debeiburi wabur Damaskus obi nyutob, anudok arman douk king Aretas neneken um nape debeini um abrudok wabur iri nape naurime um nusuwe nuweshike. Namudok aria douk nenek amam soldia heyotu hape haurime agundok shawish abrudok wabur um.  
<sup>33</sup> Aria enesh Iruhin ananish arpes shakutuwe enen raba aria shokubur shape shakutuwe enen windua iruhw yape yabuhuk adukehah um arbudok rourubi dodogowirubi narub douk sharukorub shersharieh abrudok wabur iri. Namudok aria yaruwokuk um anudok debeini um abrudok wabur iri.

## 12

### *Iruhin Neyabigan Sabaishi Eshudok Pol Kabi Neshuh Nanabek Yomnis Natrish Um*

<sup>1</sup> Ehdok aih um yanagunukuk um douk adur madae nyunek eneh yopihi aih hutogur uwe, uwok. Aria eik ta inagunukuk, um mare uwok. Aria douk ta ikripeshumep um eshudok douk yape kabi yabo yomnis aria Debeini neyabige um. Enesh eshudok, riguk douk madae itrish idukemesh iri uwe. <sup>2</sup> Riguk anob nyutob, Iruhin douk narao eik yato yakih gani iruhw nape nagiguk um binyatin iri heven. Enyudok nyatogur um, douk 14-poreish kwarahos shanak shadiguk. Aria douk madae idukemesh abom uwe. Narae um ahwudok yegenyihw aka, uwok mishin meyoh nyato. Iruhin atun nadukemesh. <sup>3-4</sup> Aria agundok yato um yopuburi abom wabur heven um, enyen douk adur

yato. Aria douk madae idukemesh abom uwe. Yato um yegenyihw aka, mishin meyoh nyato. Iruhin atun nadukemesh. Yakih iruhw aria yemnek enen baraen douk Iruhin nakripe um mare ikrip enesh arpesh um. Enyudok enen kupainyi baraen, apak arpesh douk madae wosik um mukwu apakin baraen mupe mukripesh-umen uwe, uwok. <sup>5</sup> Eik douk ta inagunukuk um enyudok Iruhin neyabige um, aria ta mare inagunukuk um eik kanak, uwok. Ta inagunukuk um agundok eik madae dodogoiwe um atin. <sup>6</sup> Adur, ikri inagunukuk akure, eik ta mare inagunukuk kabi anan nenek rohwi iri um, uwok. Um maresh? Enyudok ikri inagunukuk-umen, enyen douk adurin atin abom. Aria ta mare inagunukuk namudok, uwok. Um maresh? Yakri ta arpesh shumneke um agundok inagunukuk um eshudok yatrish iri um aria shutuk eikin nyeigur um namudok. Yakri ta shutuken meyoh shishagrakuk ehudok aduriah yenekeh iri aih.

*Iruhin Nenek Pol Narao Debeiri Eriger Um Mare Nukri Nunagunukuk Nuriguk, Uwok*

<sup>7</sup> Eik douk yape kabi yabo yomnis um aria Iruhin neyabige sabaishi yopiyopishi abom eshudok eneshenesh. Aria anan douk nakri uwok um eik inagunukuk iriguk. Namudok aria neneke yaroo debeiri eriger um eikihw yegenyihw. Aria arudok eriger um douk rape namudok. Ihih nyumneh douk yemnekor kabi enen arpen nyasuhw Satan ananin mour iri nyae um imnek eriger aria mare inagunukuk iriguk, uwok. <sup>8</sup> Biyeh atih dodogoiwe atuwe yahwar Debeini



um nukweshihuk arudok eriger. <sup>9</sup> Yahwaran aria nuwaname baraen namudok. Nakri, “Eik douk urkum morumen abom aria yape yataurumen meyoh. Aria enyudok douk jurug wosikumen. Um maresh? Abudok nyutob eikish arpesh madae dodogowish abom obi nyutob uwe, abudok nyutob eik douk dodogoiwe atuwe abom aria ta itaurumesh.” Debeini nakripe namudok aria eik douk yanadudareh abom um agundok eik madae dodogoiwe um uwe. Yakri wosik ipe namudok um itik agundok Jisas Kraiss dodogowin atun abom aria nataurume um. <sup>10</sup> Eik douk yasuhw Kraiss ananin mour. Namudok aria yanadudareh um agundok arugeh heneke madae dodogoiwe um, o shukripe shunek enenyenen um o shunek enenyenen um ipe yoweuwe um, o agundok eshudok woke um. Enenyenen amaen nyutogrume um, eik douk yanadudareh abom. Um maresh? Abudok nyutob madae dodogoiwe abom obi nyutob, Kraiss douk nataurume aria dodogoiwe abom.

*Pol Urkum Morum Nakri Nutaurum Eshesh Korin*

<sup>11</sup> Enyudok iganigadae yeyagwreh-enyi rohwin baraen douk ipak Korin meyoh peneken ba douk yeyagwrehen. Douk ta ipak Korin meyoh pupe punakripam um eikih yopihi aih, aria uwok. Adur, eik douk nyeigur woke iri, aria eik madae ipe shakam abom um amam aposel douk ipak panahwaram um nyeiguhw hwato-umam iri uwe, uwok. <sup>12</sup> Abudok nyutob yani ipak mape aria enenyenen amaen nyatogrume

obi nyutob, eik douk yeyotu dodog abom. Namudok aria Iruhin neyohur yenek enenyenen anan atun neneken iri mour nyani enyudok enen sikin mour douk yeneken nyatogur patrin aria pakitak yowiyokuk. Aria enyudok mour douk nyeyabigep abom um eik douk yenek Iruhin ananin mour iri. <sup>13</sup> Ipak Korin pani Iruhin ananish arpesh shape kupairubi warub iri douk ihipmorim yenekumep atuh aih meyoh. Kupairubi warubish Iruhin ananish arpesh, eik douk madae inekumesh eneh yopihi aih hishagrakuk ipak uwe, uwok. Ipak Korin douk atuh aih meyoh madae inekumep uwe. Um agundok madae ikep amaen um puke utabor um enyudok yeneken iri mour um uwe atin. Aria eik yenek yoweishi inahos um agundok madae irigep um eshudok uwe, aria douk yarikep um mare pusuwen pupe, uwok. Pukweshihenyuk.

<sup>14</sup> Douk yape yenek gibegabe um inatrip anah shopunek aria hutogur bioh atih. Eik douk ta inaku, aria ta mare ikep amaen um puke enesh ipakish eshudok eneshenesh, uwok. Eik douk yakri uwok um irao enesh ipakish eshudok eneshenesh, yakri uwok. Yakri irao ipak kanak putanamori um Iruhin. Ipak douk padukemesh. Batowish douk madae shurim um eshudok shishubuk um amakenyish atish uwe, uwok. Amakenyish atish apa shenek eneshenesh shaurimesh um shako batowish. <sup>15</sup> Eik douk kabi ipakin yaken um. Aria douk yanadudareh ikep ihishmori eikish eshudok aria ikep eik kanak. Ikep eik kanak um inek mour dodogoiwe atuwe um itaurum ipak atip. Douk eik yakri namudok.

Yakri eik douk yape um urkum manawasham ipak dodogoiwe atuwe yeshagrakuk kabi riguk um. Aria ipak urkwip panawashame atin ari-gaha aria ta uwok? <sup>16</sup> Ipak douk padukemesh. Abudok nyutob eik yani ipak mape obi nyutob, eik douk madae irikep um puke enesh eshudok eneshenesh uwe, uwok. Aria ipak enep douk peyagwrehume enyudok. Pakri eik douk yok-wiraeh kupaihi yah aria yenek rohw yanatrip ipakibor utabor. <sup>17</sup> Riguk eik douk yeshopok amudok hanaku. Hanaku aria madae ikripa-mugu um hunaku hunek rohwumep hutripari enesh eshudok eneshenesh hunaki huko eikesh uwe, uwok meyoh. <sup>18</sup> Douk yeshopok Taitus nanaku aria yakrip anudok anan apakin um neiranagu. Taitus nanaku, aria anan madae nunek rohwumep nunatripari enesh eshudok eneshenesh uwe, uwok. Anan nani eik douk atip urkwip abom wagipesh atuh aih.

<sup>19</sup> Ipak douk patarih baraen nyetem apudok shup iri aria penek urkum pakri apak miyagwreh um dodogeship miyawiyamuk ipakin baraen um mukri apak douk yopumi armam madae munek yoweihi aih um ipakis nabes. Aria uwok. Apak douk mape Kraiss ananipari aria Iruhin natrip nadukemesh um apak meyagwreh adurin atin. Eikish arpesih, ihinyumori meneken iri mour douk meneken um mutaurum ipak piyotu dodogowip um bilip. <sup>20</sup> Eik douk yanogugur um yakri ta ikri inak itogragu aria itrip um pugipeshuk anah kupaihi aih eik yakri wokumah iri. Namudok aria ipak shopunek ta putiwe igipesh anah kupaihi sikih aih ipak pakri

wokumah iri. Um agundok igapesh eshudok shenek yoweishi inahos iri um. Yanogugur um yakri ta itik ehudokmori yoweihi aih hupenyep. Enyudok. Puneshu-shushruk puwish putogur um, punek nyigiya um kupaishi esheshish eshudok eneshenesh um, juwehosip arigas um, punadiyogur um pakri pugipesh ipakip atip urkwip um, piyagwreh agabusin um, punek dehik kupaishi um, pununu ipakish nyeiguhw um, mare pumnek baraen um. <sup>21</sup> Abudok nyutob eik ta wata inaku itik ipak obi nyutob, eik douk yanogugur um eikin Iruhin ta nukeik agab. Nukeik agab ipakis nabes um aria ta iraomep abraen um ipakih penekkeh iri aih. Namudok aria ta puneke ireh um agundok ipak sabaipari pape um penek wehrur um, penek hanabosusih iri yoweihi abom aih um hani eneshenesh mishish shakitak-umesh iri yoweishi inahos um. Enyudok douk riguk pape um peneken aria madae pukri um pukenyuk agabus uwe, uwok.

## 13

### *Eshesh Korin Ta Gamo Shudukemesh Um Shusuhw Kraiss Ananin Baraen Dodog Um*

<sup>1</sup> Douk inaku itrip aria ta hutogur biyeh atih. Iruhin ananin baraen nyetem ananik Buk iri nyakri namudok. Nyakri, “Aria biyesh o biyesh atin arpesh shutik enen arpen nyunek enesh yoweishi inahos um, aria enyudok baraen wosik ta pukri adurin aria punek skelumen.”

<sup>2</sup> Riguk yanaku yatrip biyeh aria hagiguki douk

yakripepuguk dodogowinyi baraeen. Douk enyudok yapeik rougun aria yakri gamo inekumepogu enyudok atin baraeen. Baraeen enyudok. Abudok nyutob ikri inakumagu, eshudok arpeshe douk riguk sharik shenek yoweishi inahos iri shani ihishmorim eshudok enesh arpeshe, eik ta mare ikri wosik-umesh, uwok. <sup>3</sup> Abudok nyutob ikri wosik-umesh aria igabeyesh obi nyutob, ipak ta putik namudok aria pudukemesh pukri eik adur Kraisa apa neyohur yeyagwreh ananin baraeen. Aria mnek! Kraisa ta nukwu eik neneke dodogoiwe atuwe aria nugapesh eshudok arpeshe douk shenek yoweishi inahos iri. Ta nukwu eik aria niyabige um agundok anan dodogowin atun abom um. <sup>4</sup> Adur, riguk abudok nyutob shan shenek nyiliman rowog kruse obi nyutob, anan douk madae dodogowin uwe, uwok. Aria Iruhin anan douk dodogowin atun abom iri, aria wata nonohur nakitak aria douk nape. Kabi douk Jisas nape agundok atap aria madae dodogowin um uwe, douk apak shopunek matukur anan wata mape agundok atap aria madae dodogowip uwe. Aria abudok nyutob apak munaku agundok Korin obi nyutob, Kraisa ta nini ipak mupe munoprom aria Iruhin ta nutaurumap dodogowip um mutaurum ipak.

<sup>5</sup> Ipak atin atin ta punek skelum ipak kanak aria punosorik um ipak kanak douk pasuhw Debeini ananin baraeen dodog o uwok? Ta punek skelum ipak kanak. Adur, ipak ta pudukemesh um Jisas Kraisa douk nape ipakiruh aparuh. Douk madae nupenyep akure, ipak ta mare pupe ananish arpeshe, ta uwok. <sup>6</sup> Eik yakri ipak ta punek skelum

apak aria ta pudukemesh abom um apak adur abom masuhw Kraiss ananin mour iri. <sup>7</sup> Apak apa marig Iruhin um nutaurumep aria mare punek enesh yoweishi inahos, uwok. Aria apak douk madae munek enyudok um enesh arpes shutrump aria shukri apak munek ananin mour wosik iri uwe, uwok. Aria enesh arpes shutrump shukri apak madae munek mour wosik um uwe, enyudok nyenekesh. Apak douk makri abom um ipak punek yopihi aih. <sup>8</sup> Ipak padukemesh. Apak ta mare dodogowip um munek enesh eshudok um mukenyuk agab adurinyi baraan, uwok. Munek mour mutaurumen um nyutogur dodogowin atin um, douk wosik. <sup>9</sup> Apak douk manadudareh um meibi nyutob apak madae dodogowip obi nyutob uwe, ipak douk patogur dodogowip um bilip. Aria apak douk marig Iruhin um nutaurumep abom putogur yopishi arpes pishagrakuk kabi riguk parik patogur yopip um. <sup>10</sup> Eik Pol douk Debeini neneke um isuhw enyudok mour aria neke big um ineken. Aria douk watak yapeik rougun um ipak aria yenekumepogu enyudok baraan. Um yakri abudok nyutob ikri inak itogrumepogu obi nyutob, eik yakri uwok um dodogeshiwe atuwe igapesh um ipakih aih, uwok. Debeini neke enyudok big um itaurumep piyotu dodogowip atip um bilip. Madae nukeyen um inekep pubuhuk uwe, uwok.

*Pol Nenekumesh Yopuhi Nyumnah Eshesh Korin*

<sup>11</sup> O eikishi arpes, eik douk enyudok yakri iyatak eikin baraan aria yakri ikri, “Yopuhi

nyumnah ipak.” Ipak ta punek mour dodogowip atip um putogur dodogowip um bilip. Yakri pusuhw eikin baraan abom pupe aturuh aparuh aria aparuh hur wosik. Iruhin anan douk baugos abom um agundok urkwip panawasham kupaishi aria aparuh hor wosik shape wosik um. Ipak punelesh namudok kabi yakri um aria anan ta nini ipak pupe.

<sup>12</sup> Yakri ipak atin atin ta pugipesh apak Iruhin ananishi apakih aih aria punadudareh punapuprik um.\* <sup>13</sup> Ihishmorim Iruhin ananish arpesh shape agundok iri douk shenemepogu yopuhi nyumnah ipak. <sup>14</sup> Aria yakri Debeini Jisas Kraish wosik nutaurumep meyoh. Yakri Iruhin anan urkum munawashamep abom aria ananin Mishin nyutaurum ipak ihishmorim abom um pupe aturuh aparuh.

---

\* **13:12:** Baugenyum um baraan nyetem eshesh Grik esheshin baraan iri douk nyakri shanopuprik nuguriruh meyoh.

**IRUHING ANANIN BARAEN**  
**The New Testament in the Central dialect of the**  
**Arapesh language of Papua New Guinea**  
**Nupela Testamen long tokples Arapesh long Nuigini**  
copyright © 2003 Wycliffe Bible Translators, Inc.

Language: Arapesh

Dialect: Central

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-01-05

---

PDF generated using Haiola and XeLaTeX on 21 Feb 2024 from source files dated 31 Aug 2023

2bc22d5b-c527-53fd-8d75-3cc4c2e66cc9